

四庫全書

集部

欽定四庫全書

集部

燭湖集卷二十九

詳校官庶吉士臣吳烜

主事臣呂雲棟覆勘

謄錄監生臣朱起鳳

欽定四庫全書

燭湖集卷十九

宋 孫應時 撰

七言律詩

與宋庠父昆弟唐升伯偕遊廬山

征帆西過憶匆匆，咫尺匡廬悵望中。
天意留為今日計，春遊恰與故人同。
酒醒月落行侵曉，雲斷風來翠滿空。
識取廬山真面目，曾來栽杏作仙翁。

遣興

乾坤納納幾郵亭一舸飄然水上萍短髮判隨秋草白
雙眸剛為好山青新詩滿軸頻舒卷薄酒盈樽自醉醒
世上功名亦何事誰能愁損歎漂零

夜泊

病暑迎秋苦恨遲秋來喚起楚人悲一江風雨無眠夜
萬里關山獨往時奉檄不知翻遠別倚門應已念歸期
荻花楓葉添情緒看得明朝兩鬢絲

陪章荊州九日登高讌示坐中呈二帥

龍山東畔細腰宮，荆蜀元戎一笑同。
正復樓臺看戲馬，何妨絲管送飛鴻。
紅萸黃菊年華裏，落木長江晚思中。
下客無才敵嘲弄，聊須整帽向西風。

章荊州再招宴渚宮重湖

平生絳帳馬荊州，肯念天涯萬里舟。
百丈便從沙岸發，聯鑣還作渚宮游。
芙蓉滿意留連客，橙橘隨時斷送秋。
不惜重湖重一醉，明朝巴峽暮猿愁。

答任檢法

壯意當年隘九州天涯今日倦孤游空江水落魚龍夜
故國雲深鴻雁秋惜把山川對幽獨暫須談笑作風流
知心歎絕任夫子肯和巴歌為解愁

幕下清風十六州德人曾次有天游偏將好句招詩社
不起爭心效奕秋我拙蕢桴鳴土鼓君賢玉璫映黃流
蒼蒼雲海相期急未用煩紆擬四愁

文字潮州更柳州興來八表共神游驂騑隴阪長鳴日
鷹隼霜天得意秋鼎鼎百年均昨夢紛紛一世幾名流

為君傾倒平生話不作人間兒女愁

制司請都大會食

驛道八千慶錦里主人之初到賓筵第一得
繡衣使者之肯臨臺府交歡江山動色共嘆
光華之禮樂式觀名勝之風流恭惟某官璞
玉渾金之姿大川喬嶽之氣平生心事真是
桐鄉循吏之孫分內功名當出柏府大夫之
上疊頒詔綽三換節旄清規傳月窟之東偉

望過雪山之重斯馬斯作已看天駟之榮勲
為龍為光即俟甘泉之入奏某官芝蘭同味
萍梗相逢從容使事之謀繾綣年家之好德
星初聚和氣鼎來日烘雪後之樓臺風動春
前之梅柳畫堂簷幕開一笑於窮冬綺席笙
歌奉千鍾於永夜可無韻語上助歡顏

繡衣人物冠諸臺玉帳元戎萬里來同為西川增氣象
何妨北海試尊壘休辭醵酒十分醉要喚春風一夜回

天上德星何處聚應從井絡向三台

三游洞之外俯瞰峽江酷似釣臺

木落天清嵐翠開緩將脚力試崔嵬千年洞府煙霞外
一壑水聲風雨來客路山川生白髮古人名字剥蒼苔
平生感慨忘言地俯見滄江憶釣臺

冷副端與諸人九日登高有詩次韻

日薄天清山翠濃西來萬里有清風十分秋色罨塵外
千古佳辰感慨中雲隱蜃樓東海碧江涵雁字夕陽紅

詩翁不負登高興，消得觥船一棹空。

彭澤歸心似酒濃，
鱸嗟已負秋風。
文書雁驚喧呼裏，
尊俎江山夢寐中。
採菊誰搴三徑綠，
賜萸休想一枝紅。
朝來快讀詩仙句，
猶得塵衿一洗空。

雪中次甄雲卿監簿韻

屋頭棲鵲夜深驚，
羽衛瓊仙下紫清。
羣玉殿開香未暖，
六花陣合戰無聲。
難教小草呈新翠，
可恨疎梅半落英。
卧病袁安自愁絕，
履穿誰與問先生。

和甄雲卿詩

肝食延英責太平小臣憂國思茫冥千秋鑑在開元錄
十漸書留正觀屏莫笑顛愚如汲黯無寧齷齪似陶青
何時再見東都會萬國衣冠拱帝庭

誰貪上黨誤長平白日塵沙萬里冥死骨不應讎未雪
哀歌長覺氣如屏經生未減公孫董邊將何如去病青
安得君侯提八陣春風犁徧漠南庭

寄高司戶

一官何用落邊州
索漠風煙兩見秋
猶喜逢君結詩社
如何別我向糟丘
高懷誰與論醒醉
傑句能無憶唱酬
萬里雲開對明月
相思清興滿南樓

送別袁公四詩

幾年靜鎮絕喧囂
百吏承風服教條
惠養疲羸深保障
搜延英俊盛旌招
憂先儲粟千倉滿
威讐邊烽萬里消
已揭成規在藩屏
政須人望押班朝

露門勸學首羣公
石室還來復古風
垂世文章崔蔡右

濟時勲業管蕭中持平願取乘舟勢納約先看補袞功
力鞏皇圖知有道先生心事與天通

絕代風流士駿奔感公封植到孤根雲章假寵騰天路
寶畫分輝照華門末學有心期卒業不材無地可酬恩
從今禮數千官隔知復何時奉一樽

南風一夜漲痕吹江岫排空送袞衣萬里直愁知己遠
百年長恨此公稀眼看蜀旆沙邊起心逐吳雲峽外飛
流水高山有殊遇此生何地不瞻依

爰亞夫自涪陵以小舟追路相送及予於樾木
觀下同至萬州遊岑公洞其歸也作七言送之
不辭一舸下三州送我能為信宿留腹有琅玕元自潤
氣兼熊豹不妨道清尊近對江雲濕烏帽高尋洞卉秋
莫負武夷當日語幾披尺素淚橫流

和真長送別

吳市當年梅子真不堪萬里久辭親故無分寸酬知己
尚有平生不負人錦里風光餘別恨鏡湖雲水送閒身

感君戀戀勤相記歲暮長途知苦辛

著作李季章得閬守去國以書道別追寄四韻
不將塵土望清華珍重高情久更加肯把書來話心曲
又從今去各天涯一麾可是君恩薄百丈休憐江路賒
歸見故人應一笑為傳消息報梅花

和曾舜卿

晚風吹散雨垂垂一榻蕭然枕獨欹秋燕悄如當去客
夜蟲還是可憐時我懷松菊歸難早君赴莼鱸喜可知

已歎曲高如白雪更煩墨妙寫烏絲

和簡叔

乳燕鳴鳩惱醉眠起臨芳草思芊綿花殘柳暗春歸日
雲薄風輕雨後天酒戶已緣愁頓減詩壇寧復勇爭先
只因歸老漁樵舍不夢佳人玳瑁筵

和荅胡用之

浪喜功名少壯時髮今種種更奚為窮通信我心如鐵
謗譽從渠口勝碑息駕便應追靖節弄絃寧復待鍾期

燭湖孤嶼烟波上他日重過細說詩

和答吳斗南賞木芙蓉見懷

曾向荊州一笑同淋漓江漢酒千鍾夾城雲益迎珠履
滿眼霜花照玉容萬里壯遊前日事十年此會幾時重
憶君席上多新作醉筆如飛紙不供

和答吳斗南見寄解其自疑之意

白狗黃牛繫纜時東歸應念我西悲置之偶爾何須道
去矣飄然故一竒末路人情隨手別丈夫心事有天知

君看子濯平生友可把逢蒙待庾斯

和答葉無咎

百年一夢欲誰何底事容心強揣摩便續淵明歸去引
不題工部醉時歌故山已恐鶴相怨陋巷何妨雀可羅
多謝詩仙喚愁醒簿書叢裏少婆娑

再和

此生只合飲無何懶讀丹經學按摩得失塞翁無定在
濁清漁父有遺歌蛟龍快意生雲雨魚鳥全身避網羅

萬事忘言君會否月明來共舞婆娑

和次山見寄

啼鴉忽忽又一春別來知我更思君
畧無天氣花時雨長遣人愁日暮雲
手自愛彈招隱曲心知不作送窮文
秋風魚蟹松江上重約論詩醉夜分

和吳斗南

高帆欲發意遲遲回首飛雲耿夢思
風壤江山吳蜀道功名人物漢唐碑
無憑久厭書生語有意聊觀天下奇

已決明年徑歸隱好涼還得共驅馳

出沌復見江山和斗南

底事江山照眼新為從雲夢別經旬行吟沌口三家市
笑作天涯萬里人清夜論心真得友白雲回首奈思親
船頭又報荊州近魚雁書來未易頻

和師文

筆端陶謝不枝梧朝食千龍信手屠天與詩人清氣骨
家傳前輩學工夫從渠擾擾一丘貉看我昂昂千里駒

已喜朝廷似元祐去依日月上天衢

漢州房公湖

陰陰老木匝平湖想見房公用意初眼底園池那有此
胷中丘壑故須渠風流正自能傳世成敗應難盡信書
萬里茲遊銷客恨不辭一賞醉春餘

遊凌雲峰答陳同年韻

行行欲盡劔南州滿意凌雲九頂遊樽俎樓臺一長嘯
江山風月幾清秋古人勝賞分明在灘水悲鳴日夜流

萬里重來渺難必扁舟去住總成愁

再答陳同年游字韻紀龍巖之集

凌雲勝槩壓西州又作龍泓盡日游數樹寒梅香較晚
一坡修竹意藏秋酒間健筆能千字胃次圓機綜九流
人境雙清定難得相從何處有羈愁

發嘉州答張倅用前韻

主人今代岑嘉州倦客當年馬少游即是孤帆行萬里
空懷一日過三秋酒邊風味春生坐筆底詞源峽倒流

浪有梅花煩驛使轉頭陳迹遣人愁

益昌夜泊

孤舟了不夢邯鄲起凭闌干煙水閒五夜清風鳴鼓角
一天佳月悄江山客身憔悴衣塵黑世路崎嶇鬢髮斑
未決乘流便東下明朝且復劔門關

自興州浮嘉陵還益昌

夜促清觴醉武興曉飛輕舸下嘉陵平生海上漁樵子
此日天涯雲水僧萬里身心縈老母一年書札負交朋

秋風已定蓴鱸約
俛仰茲游記昔曾

還成都

匹馬關山不自憐
歸來巾几更蕭然
劒門南北等為客
木偶東西聊聽天
未省繁華寬旅思
可將犇走負流年
夜涼早夢秋風起
催上山陰萬里船

題籌筆驛武侯祠詩

北出當年此運籌
悠然歌卧與神謀
三軍節制馴貔虎
千里餽糧捷馬牛
漢業興亡惟我在
蜀山重複遣人愁

驛前風景應如舊江水無情日夜流

又謁武侯祠詩

城南風景故堪憐勝日經行意灑然江上竹寒偏却暑
廟前柏老尚參天堂堂不朽能千古鼎鼎何能漫百年
醉裏狂歌心浩蕩為君一吸倒觥船

辭武侯廟

三分遺論久難明獨有河汾與杜陵工拙人休計曹馬
興亡天亦恨桓靈大星忍向中宵落老柏空餘千載青

再拜征途重回首雪風吹斷淚成水

倦游書事

隻影千山復萬山兩年愁著鬢毛斑壯心未答吳鉤贈
素節聊全趙璧還劒棧風煙通紫塞峽天雲雪帶烏蠻
逢人若問渾慵答閉目揩頤一夢間

江上作

不羞燭影照蒼波獨向江頭步綠莎歷歷風煙行地闊
冥冥雲海得天多沙晴百網收漁市山晚千帆殷棹歌

約取清秋弄明月一尊重欲酌東坡

荅劍門朱宰和益昌夜泊韻

好辭絕妙過邯鄲開卷清風起坐間想見襟懷濯冰雪
如聞吟嘯滿雲山離亭劒閣千峰碧歸夢萊衣五彩斑
尊酒相逢更何許秋帆回首下牢關

荅俞履道見贈

黃塵車馬日紛囂萬事春水過眼消賴有諸公扶正氣
猶令千載見英標多君吐論心竒壯顧我周年齒動搖

好待明堂採梁棟勿誇翹楚向新樵

荅成都虞子韶鈴幹寄書信兼示近作子韶名
剛簡丞相雍公之孫也

珍重西來雙鯉魚更傳佳句起愁予相思已是五年別
多媿先無一字書欲話錦城疑是夢誰憐霜鬢不禁梳
青氈黃閣君侯事早擬相逢倘下車

和荅趙生師白見寄

休論吾昔與吾今窗下婆娑有學林會意書非求甚解

無絃琴豈要知音是中截斷談天口何處尋來立雪心
永日春風鷺百轉幽人踵息正深深

田可躬畊溪可漁此身屬我不關渠養生誰學嵇中散
避謗吾非陸敬輿風月滿懷高士傳江山到眼故人書
相思千里無多恨珍重清詩玉不如

和胡仲方撫幹白瑞香及黃櫨韻仲方名渠忠
簡公邦衡之孫佳公子也

翠錦熏籠白玉花幾年廬阜飽煙霞定知姑射同肌骨

何必離騷借齒牙

原注胡有補
離騷之句

心事早陪三友約國香今

壓五侯家主人封植無多費賸乞盧仝七椀茶

聞南軒張先生下世感惋有作玉山建業謂汪

公劉公也

玉山已失舊端明何事令人骨屢驚
拆石有聲傳建業
隕星無處弔南荆
春風未作山川暖
江水何心日夜傾
淚落中宵腸萬結
眇然湖海寄吾生

中原天意定何如豈謂人才不素儲
前輩老成今殄瘁

丁年豪雋重蕭疎武侯歲晚出師表賈誼平生流涕書
社稷無疆恩澤厚小臣何敢議盈虛

偶題

困雖有舌吾安用貧到無錐樂更深百歲難逃少壯老
多思何益去來今奕秋豈必長先手畫史誰知獨苦心
一枕春宵方化蝶三竿朝日又鳴禽

偶成

小齋隨分有琴書此外蕭然一物無地僻最饒閒意味

日長還得睡工夫四時風月吾心友千里雲山古畫圖
天賜綵衣娛鶴髮簞瓢足矣更何須

山菴感舊

短橋橫澗有精廬儼立蒼髯六丈夫長憶兒時弄泉石
誰令學宦走江湖冷風試作琴三疊涼月還須酒一壺
杖屨無忘數來往不妨樵路小崎嶇

姪孫詩

壽母重孫始見渠天教四世保同居精神已是千金子

事業應須萬卷書親戚滿前非落寞杯盤隨分不蕭疎
醉盤先攪文房寶他日無憂入異閭

妻兄張伯高來訪橫河感舊與拜先君墓下有
作次韻

衰年回首少年事尚喜初心炯自如俗態可憐人厚薄
交情那問勢親疎懶陪康樂登山屐且醉淵明採菊廬
一笑相尋非易得河梁執手更踟蹰

華門生計只初年喬嶽終難起一拳小檻清風黃卷裏

扁舟碧水白鷗前
同尋杖屨曾行處
肯謁松楸獨泣然
人事無窮今幾變
空山落日自孤煙

母氏生日

兩年萬里望飛雲
慚媿慈親費倚門
好在蘭陔扶白髮
依然梅蘂照清樽
斑衣願保長稱壽
石窳仍看疊拜恩
更問何時足懷抱
詵詵玉雪弄重孫

臘月初七日夜夢游山林間清甚賦詩半就覺
而忘之追成八句

杜門終歲少過從一室蕭然百念空紙上陳言皆妙用
胃中餘味有新功捲筇飽看千山月歌枕閒聽萬竅風
麤飯濁醪能送日蒼顏白髮任成翁

夢蜀中一山寺曰龍塘有龍祠余似嘗屢游也
題詩別之未足兩句而寤因足成之

客遊幾度到龍塘沙路縈紆草木香雪後江山餘壯觀
秋來樓閣記新涼百年此役何時再萬里東歸託興長
風景留人重回首猶須好句與平章

余生日具杯酒為母壽思壬子歲在荊州癸丑
歲在成都諸公為余作盛集而余意不適也

兩年荊益度茲晨羅綺傳觴苦勸人多謝諸公憐遠客
豈如一笑奉吾親蓴鱸此日無餘恨菽水從前得諱貧
快倒村醪供壽筭也分湯餅及比鄰

母氏生日陰晴晏溫夜後雖小雨或作或止而
帖然不風諸老人皆不須設火若前一夕則甚
雨次夕則雨且風寒真若有相之者感愧有作

草草稱觴壽我親每慚天意俯從人連宵又似去年雨
淑景偏回此日春富貴何如長得健詩書元自不羞貧
秫田五畝猶堪釀願作堯天百歲民

上史魏公壽三首

清都絳闕拱慈皇鶴駕雞鳴起未央父子至情如一日
國家慶事冠前王公功實作風雲舊帝學于今日月光
天壽兩宮千萬歲端留元老贊明昌

中興大業要規模公有初言久未孚已喜乾坤深佑德

況逢歲月正懸弧明時禮數尊三事大老精神壓萬夫
軍國平章天下望鷹揚年德正相符

中書考已敵汾陽神氣清明骨更强客倒壺觴弄風月
酒闌燈火事文章傳家正有書千卷積慶真成笏一床
看取西湖共長久年年菊會答秋光

母氏生朝會同官

原注時樂
禁初開

樂回和氣作春溫香裊祥雲映酒尊盛事同官皆有母
可人今歲喜生孫一杯首奉吾親壽百拜心知造物恩

看取朱顏長不老年年賓客醉盈門

泛東湖風浪作復止

萬頃重湖東復東意行得怕打頭風故畦遺穗粼粼在
野水寒林處處通鴻雁汀洲渺葭葦牛羊籬落見兒童
衣冠塵土空頭白慚愧扁舟把釣翁

五月末如鄞舟中戲作

七年不聽丈亭潮夢覺依然枕動搖趁得晨鐘上西渡
不妨野飯向高橋今年天故饒梅雨是處人言好稻苗

慚愧鄞山最青眼回環翠色總相招

閏十月十日自鄞城同史子應如東湖宿月波

寺

不到東湖便十年短篷還得泛霜天
千林脫葉風如剪萬里無雲月滿弦
照影婆娑吾老矣可人瀟灑故依然
敲門款語僧窗夜挑盡寒燈久不眠

杭都旅舍臘日感事

三年臘日常為客愁絕梅花獨自看
萬里塵沙走西蜀

九衢風雪卧長安生來可是儒冠誤老去偏知世路難
安得長閒伴溪叟醉歌時掣釣魚竿

西湖

十年身不到西湖把酒臨風省故吾萬里山川發天巧
三朝宮苑富皇都溪橋無處尋君復詩帳令人憶大蘓
尚許蕭然塵外客小舟終日卧冰壺

舟自震澤道吳興城外有感盖余甲午歲常過
此州斫鱸極飲今二十有一年矣是夕匆匆畧

不暇泊而風月致佳也

憶向苕溪泊酒船寧知綠髮便華顛只今行脚一萬里
重此驚心二十年箬笠蓑衣真我事清風明月苦論錢
晚涼急櫂城南去更復題詩作後緣

隨鳧巖瀑布

高山流水去沉沉迸落長屏百仞深暗有衝風起崖腹
散成飛雨到潭心梯空直下知無計攀木旁窺戰不禁
好著孤亭巧相對重來應得慰登臨

崑山龔立道作棲閑堂取李太白題龔處士別墅詩曰龔子棲閑地都無人世喧故以為名嘗託范叔剛求詩於予予許之閏八月十九日立道復自以書來為成八句

一丘一壑塵埃外三沐三薰清淨身別墅只今唐處士高風當日漢君賓打門未肯容驚夢載酒誰能徑卜鄰
千里題詩寄心賞多慚不是謫仙人

和答黃時舉貢士獻黃草布

九陌塵中一笑省肯隨風月到遙山應知枕石先秋冷
何羨槃氷及夏頌古意紵衣仍縞帶襟期華髮更蒼顏
多君志力猶強健不道人生行路難

挽徐季節先生

語言平淡骨清癯誰似黃山一老徐眼底不知人富貴
腹中惟有古詩書平生義薄雲天上日暮家無儋石儲
試問台人君識否此翁元不事名譽

年過八十更精神佚我房中自在身檢點欺心無一髮

薰涵和氣似三春莫疑見識驚流俗自是淵源到古人
前輩彫零公又往哀哀令我涕沾巾

閩憲克莊以故舊託文公五世孫明仲遠徵鄙
文老退遺棄散逸荷伯宗用昭止善浩淵子最
至善及余表姪孫陳誼予兄子豐仲弟之壻賈
熙用昭之從子大年等十餘人寒冬連旬日夜
錄之得五十卷亦已勞矣賦此為謝

老去斯文付寂寥寒枝枯甲一遺蜩虛言自歎真何補

好友相求不憚遙
敗篋塵埃煩數子
破窗風雨每連宵
詩成明日尋梅去
共看春風轉斗杓

欽定四庫全書

燭湖集卷二十

宋 孫應時 撰

七言長律

送趙清臣善湘明府民謠六韻

秘圖山上古姚州山色江光簇畫樓更鼓分明庭少事
桁楊閒冷獄無囚民言總信清如水天賜常教大有秋
人物襟懷何灑落詞章翰墨更風流朝廷久合登劉向
父老知難挽鄧侯翠竇新泉探靜樂公名長與此泉流

送趙簡叔滿秩歸閩

四海從游總弟兄年來誰復似王孫
真情每向急難見高義殊非薄俗論
入眼雲煙歸翰墨滿懷風月寄琴樽
三年叢枳勞栖鳳萬里天池合化鷗
官達於君何足道心期令我已忘言
相思驛路梅花發應倩清詩寫夢魂
簡叔自臨安之官鄂渚專書問訊多
寄近作以詩謝之用前歲贈別韻

與君異姓似諸昆文采風流帝子孫
珍重征途猶問訊

殷勤詩卷遣重論光寒牛斗韜龍劍興逸江湖著瓠樽
混混人間誰虎鼠冥冥物外獨鵬鯤閒中日月無追恨
聖處工夫豈浪言萬里此心長對面莫尋別賦苦消魂

五言絕句

和李季章校書西湖即事三首

風日都門外樓臺千萬家西湖春事足不話洛陽花
舴艋填芳渚鞦韆開粉牆人爭桃李節吾憶藕花涼
忽忽清明了能餘幾許春花開更風雨腸斷惜春人

雪夜歎

折竹聲相聞想見雪深尺愁殺小臣心橋山葬明日

鐵笛亭

鐵笛空山巔悲裂蒼崖破驚起山人指點飛僊過

石竈

石竈滄潭上烹茶定幾迴舟人因記得俗客未經來

六言絕句

題光福劉伯祥所藏東坡枯木及漁村落照圖

灑落胸中丘壑崢嶸海外風霜幻出小山枯木教成千
載甘棠

夕陽雁影江天明月蘆花醉眠乞我煙波一葉伴君西
塞山邊

十一月二十六夜夢與范石湖各賦梅花六言
覺僅記其大意足成二絕

小齋遙夜孤坐何處香來可人起看一窗寒月更憐瘦
影相親

江路月斜霜重野橋風峭波寒知負天公何事十分冷淡相看

七言絕句

別越中諸生

三年一榻占清閒門外蒼然是種山步月迎風行樂地
從今應入夢魂間

切磋長恨我空疎甚喜同門各起予贈別懶為名利語
洗心深讀聖賢書

范氏致爽園用石湖韻

可人花木四時足隨意園池百畝餘但續岷山高士傳
不談天上故人書

山光爓兀初寒外竹色連娟細雨餘一段清奇徹肌骨
錦囊碎句懶能書

黃巖新安鎮舟中和王主簿春霽遣興

天惜花時雨易晴鳥知人意喚春醒歸舟兀兀新安路
溪北溪南水正生

春郊偶作

春泥過雨屐聲慳
野水危橋欲度難
世路迷人腸斷處
黃昏天氣麥秋寒

閱書庫

寒儒事業趁三餘
細字篝燈手自書
眼底牙籤富連屋
妙年公子意何如

秋日遣興

門前白水映青山
草滿荒庭晝掩關
莫恨窮居窮到骨

平生未有此情閒

今年炎毒異他年及此秋風意灑然身世還須幾寒暑
吾生何事不隨緣

清秋佳月不尋常何限歌樓醉夜長要是超然塵外客
一杯差不負孤光

故人强半隨流水世事新來似奕碁老我壯心消折盡
鏡中唯有鬢如絲

學書成癖故童心頗復欣然得趣深一字千金亦安用

等閒容我度光陰

虛齋獨寢意偏清
夢斷秋窗月正明
匡坐偶然成導引
未須癡絕慕長生

山庵即事

田田荷葉作老色
楚楚菊叢生細香
落日空山歸鳥盡
扶筇獨自到池塘

胡元邁集句作宮詞二百首求題跋為書兩章

五侯鯖具人間味
百衲衣裒天下工
宮體故宜供帖子

玉堂何日喚詩翁

不譏飛燕在昭陽但詫流鶯滿建章
狗監若逢楊得意何妨持此奉君王

書西溪僧壁

問訊前賢滄海邊遙堤煙草故依然
誰言筦庫功名薄已活淮民二百年

碧天如水水明霞雁子橫風一一斜
袖手行吟不知晚滿川霜月浸蘆花

悠悠身世客心驚
十宿西溪夢未曾
笑把新詩留日月
碧紗黃堊聽山僧

詠史

絳帳何人拜馬融
已應羞面見兒童
早知自照頭顱醜
枉用文章殺李公

咄咄歸來技已窮
函書翻欲媚桓公
佳兒似此何須數
空使諸人怨乃翁

拊髀平生志八區
暮年家國付夷吾
誰言子女能相養

可笑周郎淺丈夫

西溪僧舍晝卧

燕子風微春晝長
獨攜書卷卧禪房
悠然一笑無人領
只有薔薇滿院香

奉和家大人將赴官舍留示及門之作

師訓勤誠數十年
此心端不愧高天
諸君體我家嚴意
學殖毋為鹵莽田

大學成功在九年
根牢幹長到參天
斯須廢棄終身困

稂莠從來易滿田

黃巖溪

杜鵑聲裏谷幽幽綠水平溪日夜流
花落空山人不到
一川煙雨起春愁

蒼山萬疊鎖荒煙百道清溪思悄然
只有東風偏識路
馬蹄花發自年年

入福昌寺詩

風日蕭蕭林翠開支筇古寺獨徘徊
山中不怪無人識

十五年前一度來

次仲氏韻

麴生真得聖之清風味超然一座傾肯向春寒慰牢落
令人心事轉和平

枵腹貪書頗自強年來得失正相當須知耳目塵埃盡
始見山林日月長

故人驚我鬢絲多一歎相逢可若何勲業向來無此夢
菱花何必遣重磨

山行

中年意與山林會勝日身兼杖屨輕正有百錢堪獨往
不將一賞負秋晴

題寒草巖

寒草巖前春鳥啼桃花無數點清溪我行已到神仙窟
不比漁郎此路迷

枕上口占

喧喧鳬雁起寒汀淡淡書窻半欲明聽徹霜鐘發深思

對床歌枕有詩成

次日湖上

山南山北水平湖
屏障天開盡不如
好在風流王謝宅
扁舟來往未應疎

送彭大老提舶泉南

先生學力定如山
應世無非意所安
一語令人深味處
不言容易祇言難

笑談終日任天真
和氣春風自襲人
畢竟胸中無適莫

不妨一世總相親

人言西府厭編摩歸卧方山意若何出處無心亦無累
寧知世上有風波

眼觀榮辱等虛空強著衣冠與世同長夏清風秋夜月
高懷應不忘山中

天然蘆素匪沽名秋入滄浪徹底清蠻舶珍奇縱山積
歸囊應比去時輕

一時人物到如今人望先生日已深願以蒼生置懷抱

勿因空谷有遐心

崑山龔立道昱有月石硯屏斗南君玉諸人皆

有詩余亦賦一絕

窻間明月鎮長在此寶如今更有無看取光輝生筆硯
可無文字繼歐蘓

舉帆松江經縣治北

楊柳煙中一塔孤東風漫漫水平湖扁舟誰倚高樓望
畫入吳淞春晚圖

贈閻丘道人

原注時
不語

天下幾人能具眼
世間萬事可忘言
猶將筆墨瀾翻說
多笑先生不憚煩

江北梅開殊晚
和林實之別駕韻

水邊籬落影疎疎
一見風姿意豁如
驛使莫嫌時節晚
少留春半作春初

楚江橫月一枝明
想見江南半落英
等是春風有先後
不妨調鼎看功成

地遠天寒飽雪霜
深林依舊十分香
玉堂茅舍公休問
一種風流壓衆芳

清詩吟賞慰花神
喚起風情寂寞濱
正是參軍舊題處
須公還作一家春

一笑無言桃李場
從教遙夜鬪寒香
紅梅何意敗家法
便欲從時作鬧粧

許氏南園十里間
蹉跎勝賞怯春寒
寄聲行客如回首
莫把尋常醉眼看

池口阻風雨詩

江頭三日繫扁舟
秋浦齊山欠一游
已自無人念羈客
更禁風雨作春愁

一江風雨送春歸
漠漠汀洲白鷺飛
舟子相呼更添纜
水來新沒釣船磯

巫山祠梳洗樓

山川楚國六千里
雲雨陽臺十二峯
神女可無哀郢意
強教梳洗為誰容

巴東秋風亭懷寇公

秋風亭上思悠悠
想見鳴琴日
日來野水孤舟故如昨
為公長嘯一徘徊

袖手窮山一少年
何曾有夢到澶淵
英雄正自無人識
蓋世功名却偶然

和真長木犀

一從月窟移根到
不落人間第二香
商略江梅是兄弟
等閒休復鬪風光

香傳萬里到蠶叢依舊江南林下風憶著小山招隱句
不堪流落更相逢

長憐花月不相謀月滿花開得更休待倚高樓吹鐵笛
為君極意作吟秋

即事

凝雲淡淡山蒼蒼天影下照生湖光漁舟散入綠蘋去
劃破琉璃三四行

江梅玉立故清妍心友猗蘭弟水仙終日相看靜無語

一時風味也堪憐

和鄭信卿

天與風情壓衆芳，雕欄翠幄奉君王。
猗蘭自欠傾城色，

空作深林一味香。

原註牡丹

綺羅絲竹沸名園，想見春風玉樹前。
況是天公饒一月，

何妨行樂倍他年。

原註春懷

舞絮飛花別茂林，狂蜂亂蝶度繁陰。
乾坤不盡春長在，

莫遣傷春意太深。

原註惜春

和陳及之

不妨客子歸路滑且喜雨來天破慳
劒南劒北好顏色
吾徒心事畧相關

詩無彫刻未為癖戰勝紛華聊自肥
萬里歸期勞夢想
百年世事幾從違

蟠龍山頭行且歌嘉陵江上重相過
人生知音不易得
舉似諸人委悉麼

江頭風雨暗行李習氣難洗儒生酸
更欲從君細商畧

不道揮斤愁鼻端

吾非斯人誰與羣
覆手翻手知交情
天南海北有離合
此生此意無寒盟

再和

文章富貴自兩事
脫欲其全天定慳
平生蕭瑟也不惡
未妨詩賦動江關

庭幃日聽烏鵲喜
里社相思雞鳧肥
獨身浪走一萬里
忽忽平生心事違

君詩音節中弦歌報我英瑤百倍過江村老人衣鉢在
同參今更有人麼

欲望中原雙目斷聽談往事幾心酸百年故家好人物
塵沙流落太無端

衮衮諸公鴛鴦羣年來看熟已忘情四時相尋風雨過
一丘一壑便慳盟

和簡叔

綠陰庭戶自生香燕子飛來話日長正有清風便午枕

更無塵夢到禪房

落日銜山山更青閒雲斂盡綠煙橫危亭獨倚闌干遍
又聽疎鐘第一聲

挽邢邦用

有美天姿粹且真溫溫玉樹氣生春從來孝友聞鄉曲
歎息如公有幾人

十載潛心學有方韜藏曾不露鋒鋦前途萬里能脂轄
此志傷君死未忘

區區倉掾救荒移實惠洋洋攝令時更有常陰在空圉
廬山遺愛未應衰

平生事業始分毫梗梓終須百丈高正擬他時好梁棟
忍看摧折在蓬蒿

傾蓋論交未一年追懷三益淚潜然為君提掖諸郎看
長已勝冠孟母賢

眉州

文華要是山川氣看到眉州四海空尊者庵前雙石筍

令人真見兩蘓公

讀通鑑雜興

南山擊缶正烏烏東市匆匆坐一書說道中興無過事

太陽侵蝕總緣渠

原注人告楊惲驕奢不悔過日食之咎此人所致

簿書流汗走君房那得狂奴故意降努力諸公了臺閣

不煩魚雁到桐江

原注光武以吏事責三公安能屈子陵耶

清濁無心陳仲弓圓機聊救漢諸公末流不料兒孫誤

千古黃初佐命功

原注仲弓弔張讓喪為諸公地耳子孫因畏禍屈節陳紀仕董卓陳羣相

曹氏

柴門三叩畧從容感激聊酬大耳公常日驅牛趁春雨

人前元不似英雄

原注孔明躬耕不求聞達今之士方翼翼然欲為孔明何哉

渭上耕屯望一秋鼓行邠復更遲留落星誤盡癡兒輩

長說宣王抗武侯

原注孔明四月至渭南留屯八月薨

建安社稷看文舉正始風流倚太初天地一身無處著

諸人休苦恨狂疎

原注漢魏之末孔文舉夏侯太初豈復有不死之理哉

平生作意輕羊舅歲晚何心佞羯奴為問荆齊是三窟

此時容有宦情無

原注王衍素毀羊祜及為石勒所擒自陳少無宦情且勸勒稱尊號

莫怪新亭泣楚囚王公原不辦中州石頭門外千年恨

他日相思一涕流

原注周伯仁之死王茂宏之罪也

原跋

先叔父燭湖所遺詩文襲藏惟謹寶慶丙戌歲越帥集
撰大卿汪公綱修會稽續志采之鄉評載先叔父小傳
於人物門仍訪問遺文所存若干即先會粹十卷以對
既而浙西司馬庾使述篤念平昔游從之誼取而鋟諸
木謹命從弟祖詒書之而并以先叔父淳熙乙巳歲在
東湖書院手著問思錄彙五十條通鑑摘義彙三十條
為經史說彙一卷祖父雪齋行狀墓銘先叔父壙記及

會稽續志小傳從弟祖開補官省劄為附錄一卷若其
餘詩文存藁與門人所記論語孟子諸經口義篇帙尚
多又當彙次為續集云丁亥歲良月望日從子從事郎
監華州西嶽廟祖祐敬識

